



16. august 2012

UKA 2012/55

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiupparput:

Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaata nr. 12, 19. november 2007-imeersup kingusinnerpaamik UPA 2013-imi allangortinneqarnissaanik, Naalakkersuisut peqquneqarnissaanik aaliangiiffigisassatut siunnersuut. Taamaaliornikkut inissiap attartukkap pisarissallugu kissaatigineqartup akia niuernermi akigititaasut tunngaviginagit, taamaallaat teknikkut aningaasatigullu inissiap akia naapertorlugu aalajangersarneqartalersillugu.

(Inatsisartunut ilaasortat Malik Berthelsen, Kim Kielsen, Siumut)

Tunngavilersuut:

Qulequttami pineqartup allannguutissatut siunnersuuterput tassaavoq, inissiap attartortittakkap, inissiatut imaluunniit nammineq pigisatut tiguneqartussatut kissaatigineqartup tunineqarnerani akiusoq **niuernermi** naligititaasut naapertorunnaarlugit **teknikkikkullu** pitsaassusaa naapertorlugu akilersinneqatalertussanngorlugit allanngortinneqarnissaa.

Nammineq pigisamik angerlarsimaffimmik pisineq tassaavoq siunissamut aningaasaliineq pitsaasoq. Politikkikkullumi qangali kissaataavoq innuttaasut pisinnaasut sapinngisamik amerlanerpaat namminneerlutik pigisaminnik angerlarsimaffeqalernissaat. Tamatumalu angunissaa 2007-imi Peqqussummik allannguinerup inornarnerulersippaa.

Allannguinerummi kingunerivaa pisortat inissiaataasa ukiorpassuit matuma siorna sananeqartut attartortunut tuniniarneqassagunik, pingaartumik Nuummi, Sisimiuni, Ilulissani Qaqortumilu inissiat pitsaassusaat qaangerujussuarlugit akilersinneqartalernerat. Assersuutigiinnarlugu Nuummi niuernikkut akiusoq naapertorlugu Radiop qaqaani inissiaq 1970-ikkunni sanaaq 2.4 mio.kr.-inik akeqartillugu attartortunut neqeroortigineqartarput. Taamak annertutigisumik inissiamut nutaanngitsumut akiliineq aningaasaliinertut pitsaasutut oqaatigineqarsinnaanngilaq.

Erseqqissaatigissavarput una siunnersuut illoqarfinni anginermi taamaallaat iluaqutigineqartussatut siunnersuutaanngimmat. Tassami illoqarfiit mikinerusut isorliunerusullu eqqarsaatigalugit Inatsisartut peqqussutaatigut ugguunakkut allanngortinneqarnikuvoq, Inatsisartut Peqqussutaannut nr.6-imut, 15.april 2003-imeersumut, §8-mi, imm. 5-itut ima allassimalerluni: *"Imm. 5. Naalakkersuisut aalajangersinnaavaat inissiaq akimik imm. 2-mi taaneqartumit allaasumik appasinnerusumillu akilerlugu tunineqarsinnaasoq niuernermi pissutsit tamanna pissutissaqartippassuk."*

Pisortat Politikerillu Peqqussummik "atornerluisutut" nalilerneqannginnissaat pissutiginnarlugu, inissiat taamak pisoqaatigisut aserfallassimatigisullu teknikkikkut pitsaassusaat

qaangerujussuarlugit tuniniarneqartarnerini attartortut pilliutigineqarnerat naapertuilluarnerunngitsutut oqaatigisariaqarpoq, piaartumillu allanngortittariaqarluni.

Peqqussutip allanngortinneqarnissaanut ilanngullugu atornerlunneqarsinnaanera pinngitsoortinniarlugu sukaterinissaq ilanngullugu pinngitsoornagu suliarineqarnissaa piumasaraarput. Assersuutigalugu attartortumiit piginnittunngornermi ukiuni aaliangersimasuni iluanaarniutigalugu tuninineqarsinnaassanngitsoq Peqqussutikkut piumasaqaataasariaqarpoq.

Innuttaasut pisinnaasut namminneerlutik inissiamik pigisaqalernissaat politikkikkut kissaataasarmat tamannalu ugguuna siunnersuutikkut qanillatorneqarsinnaammat taperserineqarnissaanut isumalluarpuq.

Allaffissornikkut kinguneqaatit

Peqqussummi §§ 11, 12 aamma 13-ip suliareqqittariaqarneri pissutigalugit siunnersuut allaffissornikkut kinguneqaateqassaaq. Inatsiseqarnermik suliassat isumagineqarnissaanut allaffissornikkut isumalluutitik atuisoqartussaanaera pissutigalugu siunnersuut Namminersorlutik Oqartussanut allaffissornikkut aningaasartuuteqarnermik nassataqassaaq. Suliap AC-mik suliaqartumik ukiup affaani 250.000 kr-it missaannik naleqartumik suliarineqarneranik naleqassasooq ataatsimut isigalugu nalilersuutaavoq. Nutserneqarneranut il.il. aningaasartuutit aningaasartuummut ilanngullugit missingiunneqarput. Aningaasartuutit taakku aningaasartuutit tamarmiusut iluanni tulleriiarinikkut pissarsiarineqartariaqarput. Tamatumalu kinguneranik suliat allat tunulluutinneqartariaqarput.

Namminersorlutik Oqartussanut aningaasatigut kinguneqaatit

Siunnersuut Namminersorlutik Oqartussanut aningaasatigut kinguneqaateqassaaq, taakkulu 2012-imi Inatsiartut aningaasanut inatsisaanni Namminersortuik Oqartussat inissianik pigisaannik tunisinikkut Namminersorlutik Oqartussat 2013-imumut 11 mio kr-inik isertitaqarnissamik konto 72.06.51-imi missingiuisimaneratigut takuneqarsinnaapput. Siunnersuutip akuerissutigineqarnerata missingiutip taassuma appartinneqarnera kingunerissavaa. Aningaasallu pissarsiarineqanngitsoortut sulianik allanik kinguartitsinikkut aningaasalerneqartariaqassaaq, taamaaliornikkut Nunatta Karsiata aningaasartuutai amerlineqaqqunagit. Illuatungaaticullu attartortut najukkaminnik nammineq pigisatut tigusinerat naapertorlugu pisortat aserfallatsaaliinermut aningaasartuutai annikilliarternissaat naatsorsuutigineqarpoq.

Innuttaasunut namminersorlutillu inuussutissarsiortunut kinguneqaatit

Siunnersuut namminersorlutik inuussutissarsiortunut kinguneqaateqassanganneqanngilaq. Siunnersuut innuttaasunut attartukkani najugaqartunut, attartukkaminnullu tigusissallutik kissaateqartunut kinguneqaateqassaaq. Innuttaasut ilai siunnersuut aqqutigalugu inip attartukkamik tiguneqarneranut aningaasatigut iluaquserneqassapput, taamaakkaluartorli najugarisat nutaanngeqisut ullutsinnut naleqquttumik nutarterissagunik annertuumik aningaasartuuteqarnissaat naatsorsuutigineqartariaqarpoq. Innuttaasullu ilai taamak annertutigisumik siunnersuutip piviusunngortinneratigut iluaquserneqassanngillat.